

Najib Ucap Selamat Berjaya Kepada Calon SPM
Bernama
04 November, 2012

KUALA LUMPUR, 4 Nov (Bernama) -- Perdana Menteri Datuk Seri Najib Tun Razak menyampaikan ucapan selamat berjaya kepada calon-calon peperiksaan Sijil Pelajaran Malaysia (SPM) yang bermula Isnin.

Ucapan itu disampaikan Najib melalui laman sosial Twitternya @Najib Razak malam ini.

"Saya berdoa agar calon-calon berjaya dengan cemerlang dalam peperiksaan SPM bermula esok. Kepada guru dan ibu bapa, semoga usaha-usaha pendidikan akan membawa hasil," katanya yang kini berada di Vientiane, Laos untuk menghadiri Sidang Kemuncak Asia-Eropah ke-9 (ASEM 9).

Seramai 472,541 calon akan menduduki peperiksaan SPM di 3,590 pusat peperiksaan di seluruh negara mulai esok hingga 6 Dis ini.

Sebanyak 415,530 calon daripada sekolah kerajaan, bantuan kerajaan dan sekolah agama bantuan kerajaan, manakala 7,708 calon daripada sekolah di bawah agensi kerajaan selain kementerian dan 7,946 calon daripada sekolah menengah agama negeri.

Menurut Lembaga Peperiksaan, Kementerian Pelajaran Malaysia, seramai 11,309 calon sekolah swasta yang berdaftar dengan kementerian, 28,148 calon sekolah menengah agama rakyat dan 1,900 calon persendirian juga akan menduduki peperiksaan tersebut.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=706923>